

**PROGRAMA DE FOMENTO DO EMPREGO EN EMPRESAS DE ECONOMÍA SOCIAL  
E DA PROMOCIÓN DO COOPERATIVISMO.  
Convocatoria 2014**

Orde do 21 de febreiro de 2014 (DOG nº 46, venres, 7 de marzo de 2014)

**Finalidade:** Promover a incorporación de persoas desempregadas ás entidades de economía social e apoiar o desenvolvemento de proxectos de creación deste tipo de empresas a través de determinados programas.

As **solicitudes a máis dun programa deberán formalizarse por separado**. A administración ten un prazo de cinco meses para resolver e notificar a concesión ou denegación.

Con carácter xeral e para todos os programas o período de execución das accións abranguerá desde o 1 de xaneiro de 2014 ata o 14 de novembro de 2014.

Excepcionalmente, as accións realizadas entre o 20 de xullo de 2013 e a data desta orde (7 de marzo de 2014), poderán dar lugar ao acceso a condición de beneficiarios. Neste caso, o gasto subvencionable corresponderá ao último trimestre de 2013 e ao exercicio orzamentario de 2014.

A data máxima de xustificación das accións subvencionadas será o 15 de novembro de 2014.

**Importante:** Cando a beneficiaria destas axudas sexa a cooperativa, esta deberá estar ao día no cumprimento das súas obrigas legais referidas ao depósito de documentos e inscricións dos acordos sociais no rexistro de cooperativas correspondente.

**Prazo de solicitude: 7 de abril de 2014.**

**PROGRAMA I: Fomento de emprego en cooperativas.**

**Finalidade:** Fomentar a incorporación de *persoas desempregadas e persoas asalariadas temporais da cooperativa*, como socios e socias traballadores/a con carácter indefinido. **Deberá supoñer incremento de emprego fixo respecto aos doce meses anteriores.**

### **Beneficiarias:**

- Cooperativas de traballo que incorporen como socios e socias traballadores/as a persoas que no momento da incorporación sexan desempregadas inscritas como demandantes de emprego no Servicio Público de Emprego.
- Cooperativas de traballo que incorporen como socios e socias a persoal asalariado vinculado á empresa por un contrato de traballo temporal non superior a 24 meses, cunha vixencia mínima de 6 meses á data da súa incorporación.

Para os efectos desta axuda, o requisito de estar desempregado/a e inscrito/a como demandante de emprego no Servicio Público de Emprego deberá cumprirse na data de alta da persoa socia traballadora no correspondente réxime da seguridade social (importante cumprir este requisito, incluso cando se tramitou pago único do desemprego).

**Contía das axudas:** de **5.500 € ata 10.000 €** segundo circunstancias.

No caso de cooperativas xuvenís as contías incrementaranse nun 25%

<b>PROGRAMA II: <u>Fomento do acceso á condición de persoa socia traballadora</u></b>
---

**Finalidade:** Fomentar o acceso á condición de persoa socia traballadora, mediante a concesión de axudas económicas destinadas a financiar, parcialmente, a achega ao capital social que debe desembolsarse para incorporarse á cooperativa.

### **Persoas beneficiarias:**

- Persoas desempregadas inscritas como demandantes de emprego no Servicio Público de Emprego, que accedan a condición de persoa socia traballadora dunha cooperativa de traballo asociado.
- Persoas asalariadas das cooperativas que accedan á condición de persoa socia traballadora.
- Persoas en activo e que figuren de alta no Servicio de Emprego de Galicia como demandantes de mellora de emprego, cando accedan á condición de persoa socia traballadora.

**Contía das axudas:** **Ata 4.500 €**, sen que en ningún caso poda ser superior aos importes efectivamente desembolsados en concepto de achega de capital social e cota de ingreso.

O importe da axuda deberá manter a súa condición de capital social da cooperativa, durante un período mínimo de cinco anos.

No caso de cooperativas xuvenís as contías incrementaranse nun 25%

**PROGRAMA III: Impulso de proxectos empresariais cooperativos e asistencia técnica.**

**Finalidade:** Conceder *axudas económicas para a posta en marcha dos proxectos empresariais*, tanto de nova creación coma os xerados por entidades existentes.

Poderán ter a consideración de proxectos subvencionables a *transformación doutras fórmulas empresariais en cooperativas*, a constitución de novas entidades ou o lanzamento de novas áreas funcionais ou territoriais de actividade polas entidades en funcionamento.

**Beneficiarias:** as cooperativas de nova creación ou as que acometan novos proxectos empresariais. Serán tamén beneficiarias as persoas físicas e empresas privadas que presten os *servizos de asesoramento e acompañamento de proxectos*.

Son beneficiarias das axudas de “*apoio ás entidades que presten servizos de natureza social e á comunidade*”, as entidades que presten as súas actividades na área dos servizos sociais, da integración social, da protección do medioambiental e do tempo libre debidamente inscritas no Rexistro de Cooperativas de Galicia.

**Accións subvencionables e contía:**

**a) Profesionalización e cualificación empresarial:**

**1.- Axuda para a contratación de directores/as ou xerentes.** Subvencionarase por un período máximo dun ano o 50% do seu custo total, sen que poida superar a contía de 20.000 € por cooperativa. Debendo respectar o disposto para a contratación de persoal asalariado pola lexislación vixente de cooperativas e asumir a obriga de manter no cadro de persoal da entidade o director/a ou xerente, como mínimo polo tempo subvencionado.

Deberase xustificar a súa necesidade e a dificultade da cooperativa para facer fronte ao custo correspondente cos seus recursos propios.

**2.- Apoio ás entidades que presten servizos de natureza social e á comunidade.** Poderán ser obxecto de subvención ata o 75% dos gastos ocasionados con motivo da **incorporación como persoas socias ou contratación de** traballadores/as sociais, psicólogos/as e outros/as **profesionais de especial cualificación** que resulten necesarios para a viabilidade da empresa e unha adecuada prestación do servizo. A subvención calcularase sobre o importe total da contratación ou incorporación, para un período máximo dun ano, debendo respectar o disposto para a contratación de persoal asalariado pola lexislación vixente de cooperativas. A contía non superará os 20.000 € por cooperativa.

**3.- Formación empresarial.** Subvencionase **ata o 75%** do custo dos servizos prestados ata o límite máximo de 5.000 euros por beneficiario, co fin de cubrir as necesidades de formación das persoas

socias incorporadas a cooperativa durante a posta en marcha da empresa, nas actividades de dirección e xestión empresarial.

## **b) Asistencia técnica:**

**1.- Asesoramento e acompañamento de proxectos.** Comprende desde as actividades informativas e formativas dos/as promotores/as, previas ó inicio da actividade ata a elaboración do plan de empresa e o seu seguimento e asesoramento na execución.

É precisa a elaboración dun plan de traballo normalizado e poden solicitala tanto pola cooperativa promotora como as entidades o profesionais que presten o servizo.

A contía da subvención ascenderá a 30 euros por hora de información, formación ou asesoramento por cada proxecto.

**2.- Outras accións de asistencia técnica.** Poderán ser obxecto de subvención **ata o 75%** dos gastos ocasionados con motivo da posta en marcha de proxectos cooperativos, ata un máximo de 5.000 € cos seguintes límites:

- Asistencias técnicas consistentes na elaboración de estudos de viabilidade, de organización, de comercialización, auditorías e outros informes análogos ata un máximo de 3.000 €.
- Asesoramento na elaboración dos estatutos sociais e regulamentos de réxime interno ata un máximo de 2.000 €.

**3.- Gastos de constitución.** Poderán ser obxecto de subvención **ata o 75%** dos gastos ocasionados con motivo da formalización e inscrición da escritura pública e demais trámites derivados do proceso de constitución da cooperativa ata un máximo de 1.500 € para gastos de notaría e inscricións en rexistros oficiais e 500 € adicionais para a realización doutros trámites.

A contía máxima das axudas obtidas por beneficiaria para este programa non poderá superar os 20.000 €.

As axudas de “formación empresarial” e as axudas “outras accións de asistencia técnica” resultarán incompatibles coas axudas “asesoramento de acompañamento de proxectos”

## **PROGRAMA IV: Promoción das cooperativas xuvenís.**

**Finalidade:** apoiar o desenvolvemento de proxectos de creación de cooperativas xuvenís mediante subvencións directas para o financiamento dos custos derivados do lanzamento da actividade.

**Beneficiarias:** As **cooperativas xuvenís de nova creación** formadas maioritariamente por persoas socias traballadoras que teñan entre 16 e 29 anos de idade.

Considerase “*entidades de nova creación*” as **que non superen os dous anos de actividade**, contados ininterrompidamente desde a data de alta no imposto de actividades económicas ou, de ser o caso, da alta no censo de obrigados/as tributarios/as do Ministerio de Economía e Facenda, ata a finalización do prazo de presentación de solicitudes.

**Obxecto e Contía:** subvención directa para financiar parcialmente os gastos correntes derivados do inicio da actividade **ata un importe máximo do 75%** do seu custo, excluídos impostos.

Poderán ser obxecto de subvención os seguintes gastos correntes:

- Arrendamento e mantemento de locais, instalacións, maquinaria e elementos de transporte.
- Elaboración de material publicitario funxible e anuncios publicitarios nos medios de comunicación.
- Seguros, gastos financeiros e bancarios.
- Enerxía, comunicacións e transportes.
- Material de oficina.
- Consumibles para equipos informáticos e maquinaria.
- Mantemento de equipos e sistemas para as tecnoloxías da información e as comunicacións, de páxinas web e de sistemas telemáticos de xestión e para o comercio electrónico.
- Roupa de traballo e material funxible para a prevencións de riscos laborais.

O importe máximo desta subvención será de 15.000 euros por entidade beneficiaria.

Nesta axuda poderase facer efectivo en concepto de pagamento anticipado ata un 80% do importe da subvención, logo de solicitude e sen que en ningún caso o pagamento anticipado poida superar os 12.000 €

<b>Programa V: <u>Intercooperación e integración cooperativa</u></b>
--

**Finalidade:** Impúlsanse as actividades de intercooperación, realizadas de forma conxunta por entidades de economía social, especialmente os procesos de integración empresarial cooperativa co fin de acadar a dimensión necesaria para mellorar a competitividade, capturar maior valor engadido e satisfacer adecuadamente as necesidades das persoas que forman a cooperativa.

Tamén proxectos de colaboración empresarial para a consecución de obxectivos comúns relacionados coa Investigación, Desenvolvemento e Innovación, coas Tecnoloxías da Información e as Comunicacións, coa loxística, comercialización e internacionalización, subvencionando parcialmente os gastos necesarios para a súa realización.

**Beneficiarias:** as cooperativas que participen en proxectos de integración ou colaboración empresarial; requírese un mínimo de catro entidades participantes no proxecto de **colaboración empresarial**, agás para o caso de **proxectos de integración empresarial** que resultará suficiente a participación de dúas entidades.

Igualmente poderán ser beneficiarias deste programa as cooperativas de segundo grado e as cooperativas que resulten dun proceso de fusión realizado no último ano ou no período de execución desta orde.

#### **Actividades subvencionables:**

##### **1.- Configuración de proxectos de integración e intercooperación:**

- Celebración de encontros, seminarios e reunións das entidades participantes nos procesos de colaboración e integración, e das súas persoas socias e asalariadas.
- Elaboración, dos estudos e informes precisos para o impulso dos proxectos de integración e colaboración, en especial estudos de viabilidade, auditorías e proxectos técnicos.

##### **2.- Actividades de investigación, desenvolvemento e innovación, e inmersión nas tecnoloxías da información e as comunicacións:**

- Creación e dinamización de redes de cooperación para a investigación, desenvolvemento e innovación, así como a consolidación de equipos especializados.
- Labores preparatorias para o acceso aos programas, proxectos e incentivos impulsados polas administracións públicas e outras institucións en materia de I+D+i.
- Proxectos de mellora conxunta de utilización das tecnoloxías da información e as comunicacións.
- Mantemento de páxinas web e de sistemas e redes telemáticas para a colaboración empresarial e para a xestión dos proxectos, así como para a xestión empresarial e accións de carácter análogo.

##### **3.- Comercialización e internacionalización**

- Deseño de catálogos de produtos e servizos no marco da páxina web [intercooperar.coop](http://intercooperar.coop), e publicidade.
- Loxística, distribución conxunta de produtos e oferta integrada de servizos.
- Posta en marcha de tendas cooperativas, puntos de atención e outras fórmulas de venda e atención directa ao consumidor e usuario.
- Experiencias piloto de colaboración entre cooperativas produtoras ou prestadoras de servizos e cooperativas de consumidores e usuarios ou comercializadoras (seguros, avais,

gastos financeiros e promocionais, entre outros).

- Misións comerciais e presenza en ferias, mostras e congresos (loxística, desprazamento, aloxamento, exposición de produtos e servizos, e aluguer de espazos, entre outros).
- Actividades de mercadotecnia en Internet, redes sociais e comercio electrónico

**Contía das axudas:** 75% dos gastos necesarios para a súa realización, ata un máximo de 5.000 euros por cada entidade participante, **agás** no caso de integración empresarial que se eleva a 10.000 euros por entidade, e un límite máximo global de 30.000 por solicitude.